

# **Forskrift 15. april 2020 om karantenepåbod for reisande til og frå Oslo og Viken (med unntak av Kongsbergregionen), og forbod mot innreise for opphald på fritidseigedom i kommunen**

**Heimel:** Fastsatt av kommuneoverlegen i Vinje kommune 15. april 2020 med heimel i smittevernlova frå 5. august 1994 nr. 55 § 4-1 første ledd bokstav d), og i samsvar med rundskriv frå Helse- og omsorgsdepartementet frå 29.03.2020 «Veileder til kommunene om lokale karantenereregler eller innreiserestriksjoner i forbindelse med utbruddet av Covid-19».

## **§ 1 Føremål**

Føremålet med denne forskrifta er å beskytte eit sårbart helsevesen slik at nødvendig helse- og omsorgstenester i Vinje kommune blir oppretthalde. Føremålet er også å stoppe spreiring av Covid-19 og beskytte sårbare grupper. Med tilvising til nasjonale tiltak og til Folkehelseinstituttets råd og nasjonal rettleiar har kommunen vedtatt denne lokale forskrifta.

## **§ 2 Karantenepåbod for reisande til og frå Oslo og Viken**

Alle som har vore i Oslo eller Viken fylke, med unntak av kommunar oppført i § 4, skal i heimekarantene i 14 dagar etter innkomst eller tilbakekomst til Vinje kommune. Dette gjeld også arbeidspendlarar som pendlar ut frå kommunen. Husstandsmedlemer er ikkje omfatta av forskrifta. Det er ikkje utreiseforbod om ein er pålagt heimekarantene, men ein ny karanteneperiode vil starte opp ved ny innkomst til kommunen.

## **§ 3 Forbod mot opphald på fritidseigedom i Vinje kommune**

Det er ikkje høve for personar busett utanfor Vinje kommune å reise til kommunen for å opphalde seg på fritidseigedom sin i Vinje kommune.

Det einaste unntaket er «*strengt nødvendig vedlikehold eller tilsyn som er nødvendig for å avverge store materielle skader*».

## **§ 4 Unntak frå denne lokale forskrifts karantenekrav:**

- a. Viken-kommunar Kongsberg, Nore og Uvdal, Flesberg og Rollag (Kongsbergregionen) er unntatt karantene reglane.
- b. Køyring gjennom Oslo og Viken utan stopp er unntatt karantene reglane.
- c. Medisinsk nødvendig besøk til helseverksemdar er ikkje omfatta av karantenereglane. Det gjeld både pasient og sjåfør.
- d. Besøk til alvorleg sjuke familiemedlemmar og deltaking i gravferd.
- e. Barn med foreldre som bur på ulik adresse kan reise fritt mellom bustadene.
- f. Tilsette i barnevernstenesta og bruk av barnevernstenesta.

Elles gjeld dei nasjonale føringar for karantene og isolasjon ved sjukdom.

## **§ 5 Klageadgang**

Fylkesmannen avgjer klage over kommunalt eller interkommunalt vedtak såfram ikkje noko anna er bestemt i lova.

## **§ 6 Økonomisk ansvar**

Vinje kommune tek ikkje på seg økonomisk ansvar som følgje av pålagte tiltak.

## **§ 7 Iverksetting og varigheit**

Denne forskrifta gjeld frå onsdag 15. april 2020 kl. 17:00 og gjeld i 7 dagar.

## **Øvrig informasjon**

### **Rettsleg grunnlag:**

Gjennom delegasjonsreglementet til Vinje kommune vedteke av kommunestyret 14.11.2019 har kommunestyret delegert sin mynde etter smittevernlova § 4-1 fyrste ledd til kommuneoverlegen i Vinje.

Grunnleggande krav ved iverksetting av tiltak etter § 4-1 går fram av smittevernlova § 1-5:  
*"Smitteverntiltak etter loven skal være basert på en klar medisinskfaglig begrunnelse, være nødvendig av hensyn til smittevernet og fremstå tjenlig etter en helhetsvurdering. Ved iverksettelse av smitteverntiltak skal det legges vekt på frivillig medvirkning fra den eller de tiltaket gjelder. Tvangstiltak kan ikkje brukes når det etter sakens art og forholdene ellers vil være et uforholdsmessig inngrep."*

Det blir også vist til Helse- og omsorgsdepartementet sin forskrift frå 13.03.20 «Forskrift om karantene mv. etter reiser utanfor Norden», forskrift frå Helse- og omsorgsdepartementet frå 15.03.2020 «Forskrift om karantene, isolasjon og forbud mot opphold på fritidseiendommer mv. i anledning utbrudd av Covid-19», og rundskriv frå Helse- og omsorgsdepartementet frå 29.03.2020 «Veileder til kommunene om lokale karantenerregler eller innreiserestriksjoner i forbindelse med utbruddet av Covid-19».

### **Grunngjeving:**

Covid-19 er erklært som eit alvorleg utbrot av allmennfarleg smittsam sjukdom som kan få alvorlege helsekonsekvensar for mange menneske. Sjukdomen er òg erklært som ein pandemi og ei alvorlig hending av tyding for internasjonal folkehelse av WHO. Helsedirektoratet vedtok 12.03.20 omfattande tiltak for å hindre spreiding av Covid-19 og for å bidra til å halde i hevd naudsynte helse- og omsorgstenester. Her vert det mellom anna sagt:

*"Helsedirektoratet ønsker at innanlands transport skal gå mest mulig som normalt, men vi oppfordrar sterkt alle til å unngå fritidsreiser. Vi oppfordrar til å unngå reiser som ikkje er strengt nødvendig (både innanlands og utanlands), unngå offentlig transport viss du kan, unngå andre steder kor du lett kommer nær andre, unngå nærkontakt med andre."*

Covid-19-epidemien har i dag ulikt omfang i Noreg, og Folkehelseinstituttet har uttalt at epidemien no har gått over i ei ny fase der ein ikkje har klart å identifisere smittekjeda for alle som vert sjuke. Dette inneber at ikkje alle nye smittetilfelle lenger let seg spore til

utlandet. Området Oslo og Viken er i ei særstilling når det gjeld smittespreiing og talet på smitta. Det er grunnlag for utvida karantenerreglar for personar som har vore i dette området.

I vår region er smittepresset framleis lågt, og alle kjente smittetilfelle kan sporast. Vår kommune er kanskje i ein annan fase av pandemien enn andre delar av Noreg. Kommuneoverlegen ser det som avgjerande å redusere smittepresset frå utanfor regionen. Regionen er prega av små lokalsamfunn og lange avstandar, og kritiske samfunnsfunksjonar vil vere ekstra utsett her ved ein omfattande epidemi. Kommunane generelt og helse- og omsorgstenesta spesielt har avgrensa kapasitet. Det gjer det nødvendig å hindre omfattande bruk av fritidsbustader ut april, og særleg siste helga i april. Det er grunn til å tru at svært mange av eigarane av dei 5700 fritidseigedomane i kommunen vil reise til hytta i Vinje siste helga i april - etter at det nasjonale hytteforbodet blir avslutta 20. april. Det er faktisk grunnlag for å tru at mange tusen då ville nytta høve til å sjå til hytta som dei ikkje har fått vore på i påska, og at dei vil nytte siste skihelga i 2020. Det ville ha ført til innreise av mange tusen menneske til Vinje samstundes på 3 dagar.

Kommuneoverlegen ser denne forskrifta som ei naturleg følgje av Folkehelseinstituttet sine tilrådingar, og Helsedirektoratet sitt nasjonale vedtak. I den noverande situasjonen er det naudsynt å førebyggje og motverke spreiiing av covid-19. Tiltaket vert vurdert som naudsynt både for å beskytte sårbare grupper og for å halde i hevd naudsynt kapasitet i helsetenesta.

Kommuneoverlegen vurderer at smitteverntiltaket har ei medisinskfagleg grunngeving, er nødvendig av omsyn til smittevernet og for å halde i hevd tilstrekkeleg smittvernkapasitet i kommunen og i helse- og omsorgstenesta. Tiltaket vert difor vurdert som forholdsmessig og tenleg utifrå ei heilskapsvurdering.

Etter kommuneoverlegen si vurdering vil den samfunnsmessige nytta ved smitteverntiltaket overstige den belastning og ulempe for dei tiltaket gjeld. Frivillig medverknad er vektlagt i vurderinga.